

## Y PASG 4

ACTAU 9:36-43; SALM 23;  
DATGUDDIAD 7:9-17; IOAN 10:22-30

---

---

### ● Gweddi agoriadol

Cawn lun rhyfeddol o Dduw'r bugail yn y Beibl, ac mewn rhannau o'r byd nid yw'r afael dynn rhwng bugail a phraidd wedi newid llawer ers dyddiau'r Beibl. Mae dibyniaeth y defaid ar eu bugail am ddiogelwch a chynhaliaeth yn ddrych o'n perthynas â Duw.

Fugail da, sy'n ein harwain heibio'r dyfroedd tawel ac i borfa fras, bydd yn agos atom yn ein cyfarfod heddiw. Boed i ni borthi ar dy air, profi dy gysgod a chael ein cynnal gan dy Ysbryd, heddiw a phob dydd.

### ● Moliant

Dduw cariad,  
gofali amdanom fel Bugail,  
ein harwain at borfa fras a dŵr rhedegog.  
Gofali amdanom fel Tad,  
yn tynnu y rhai a geri i'th freichiau.  
Gofali amdanom fel Gwardwr,  
yn maddau i bawb sy'n tynnu'n agos atat mewn ffydd.  
Gofali amdanom fel Arglwydd a Brenin,  
ein dwyn i galon dy deyrnas.  
Dduw cariad,  
gofali amdanom.  
Pa fendith fwy all fod  
na hyn?

### ● Cyffes

Pan grwydrwn oddi ar y llwybr a ddewisaist,  
wedi'n denu gan addewid am well dyddiau,  
ein temtio gan y tirlun o'n cwmpas,  
chwilio am ffordd wahanol,  
maddau i ni.

Dangos y ffordd well i ni –  
cerdded yn ôl diogel dy droed,  
gwrando ar dy lais yn ein galw,  
bwydo ar dy air sy'n faeth,  
byw ein bywyd mewn gwasanaeth diolchgar bob dydd.

### ● Diolch

Clod ac anrhydedd,  
gogoniant a grym  
sydd i'n Duw  
byth bythoedd.

Derbyn yr offrwm hwn heddiw –  
ein diolchgarwch  
am y cwbl a wnest  
ac a wnei eto yn ein bywydau;  
a'n haberth ninnau,  
y cwbl allem wneud i ti  
a'r rhai y'n harweini atynt.

Clod ac anrhydedd,  
gogoniant a grym  
sydd i'n Duw  
byth bythoedd.